

四庫全書

集部

欽定四庫全書

東坡全集卷六十九

宋 蘇軾 撰

表狀四十二首

揚州謝到任表二首

臣軾言伏蒙聖恩除臣知揚州臣已於今月二十六日到任訖者支郡養痾裁能免咎通都移牧自愧何功屢玷恩榮實深慙汗臣集中謝伏念臣早緣竊祿稍習治民在先帝日已歷三朝近八年間復忝四郡平生所願

滿足無餘志大才疎信天命而自遂人微地重恃聖眷
以少安恭惟太皇太后陛下子惠萬民器使多士以謂
朝廷之德澤付於郡縣與監司乃眷江淮之間久罹水
旱之苦隣封二浙饑疫相薰積欠十年豐凶皆病臣敢
不上推仁聖之意下盡疲驚之心庶復流亡少寬憂軫
臣無任

又

一麾出守方愧媿安十國為連復膺寵寄恩榮既溢慙

汗靡寧臣某中謝伏念臣本以鰥生冒居禁從頃緣多
病力求潁尾之行曾未半年復有廣陵之請蓋以魚鳥
之質老於江湖之間習與性成樂居其舊天從民欲許
擇所安恭惟皇帝陛下欽明文思剛健純粹天功默運
灼知萬化之情人材並收各取一長之用如臣衰朽尚
未遐遺命至蹇而祿已盈每懷憂懼志雖大而才不副
莫報恩私臣無任

謝賜卹刑詔書表二首

臣軾言伏蒙聖恩賜臣欽卹刑獄詔書一道者時令舉行雖云故事天心惻怛本出至誠德既洽於好生民雖死而無憾臣某誠惶誠懼頓首頓首伏以刻木畫地志士不居鑠石流金平人猶病宜軫聖神之念實為哀敬之先訓誥丁寧吏民感動恭惟皇帝陛下禹湯罪己堯舜性仁以不忍人之心行若稽古之政豈止緩獄實期無刑臣敢不推廣上恩厚風俗於無犯申嚴法意消盜賊於未萌少假歲時庶空囹圄臣無任

又

暑雨其咨既軫小民之病麥秋已至復虞輕繫之淹祗
服訓詞灼知天意臣某中謝伏以仁聖之德哀矜為先
常內恕以及人故深居而念遠齋戒處掩則知暴露之
勤紛紜裨延不忘纍紲之苦吏既罔懈民知無冤恭惟
太皇太后陛下事法祖宗德參天地凱風養物散為扇
暘之涼靈雨應時同沾執熟之濯臣敢不盡其哀敬濟
以寬明奉漢律之嚴母令瘼死推慈母之意務在平反

庶竭愚忠少行德意臣無任

賀立皇后表二首

臣軾言伏覩制書今月十六日皇后受冊禮成者繼女
維莘覩天之妹事關廟社喜溢人神中賀臣聞三代之
興皆有內助二南之化實本人倫維關雎正始之風具
既醉太平之福民有所恃邦其永昌恭惟皇帝陛下自
誠而明惟睿作聖輯寧夷夏德既茂於治朝輔順陰陽
政兼修於內職既膺大慶益廣至仁下逮海隅夫婦無

有愁歎上符天造日月為之光明受祿無疆與民同樂
臣無任

又

吉日既涓象儀允正穀珪往聘象服來朝中賀臣聞周
姜任姒之賢位非皆極漢陰馬鄧之貴德或有慙盛哉
六禮之陳襲此三宮之慶恭惟太皇太后陛下任付託
之重躬保佑之勞公天下不私其親配宸極必先以德
徽音不墜嗣成慈孝之風仁壽無疆坐享雲來之養臣

限以官守不獲躬詣闕庭臣無任

賀坤成節表

臣軾言歲復六壬襲嘉祥於太史火流七月紀令節於
詩人盡海宇之含生舉欣榮於茲日臣某中賀臣聞君以
民為心體天用民為聰明未有心胖而體不紓民悅而
天不應故好生惡殺是為仁壽之基捐利與民斯獲豐
年之慶恭惟太皇太后陛下恭儉一德勤勞百為推天
覆地載之心阜成民物盡父教母憐之道誨養臣隣共

知難報之恩必享無疆之福臣以出守淮海無由躬詣
闕庭臣無任

謝除兵部尚書賜對衣金帶馬狀二首

蒙恩賜臣衣一對金帶一條并魚袋金鍍銀鞍轡馬一
匹者盛服在躬無復曳婁之歎名駒出廐遂忘奔走之
勞施重丘山身輕毫末伏念臣少賤而鄙性推少文衣
敝緼袍未嘗有恥乘欸段馬自以為安豈意晚年屢膺
此寵此蓋伏遇皇帝陛下紹隆景命總攬羣英無競維

人勢已加於九鼎惟德其物恩有重於千金臣敢不上
體眷懷勉思報稱贈繞朝之策愧不能謀振屈原之衣
期於自潔臣無任

又

伏以在笥之珍本出於民力脫驂之賜以結於士心顧
臣何人屢膺此寵伏念臣學本為己材不遑時乘伯厚
之車雖云疾惡東公西之帶愧不能言而二年之間三
拜是賜此蓋伏遇太皇太后陛下心存社稷德協天人

以長策駕馭四方以盛德藩飾多士故令衰朽猶玷光
華豈曰無衣蓋獨求於安吉慨然攬轡敢有志於澄清
臣無任

謝兼侍讀表二首

伏奉制書除臣守兵部尚書兼侍讀者重地隆名不擇
所付清資厚祿以養不才中謝伏念臣以草木之微當
天地之澤七典名郡再入翰林兩除尚書三忝侍讀雖
當世之豪傑猶未易居矧如臣之孤危其何能副恭惟

皇帝陛下聖神格物文武憲邦重離繼明何煩燭火之
助大厦既構尚求一木之支而臣白首復來丹心已折
望西清之帷幄久立徬徨聞長樂之鼓鐘恍如夢寐莫
報丘山之施猶貪頃刻之榮臣無任

又

流汗恩榮再辭莫獲強顏衰朽一節以趨臣軾中謝恭
惟先帝復六卿之名本欲後人識三代之舊古今殊制
間劇異宜武選隸於天官兵政總於樞輔故司馬之職

獨省文書而師氏之官職在論說命臣兼領聖意可知
恭惟太皇太后陛下約已裕民忘家憂國知先王之兵
必本於道德故以儒臣為七兵知人主之學必通於民
情故目郡守為五學而臣迂踈不可強合早緣衰病難
以久居終當自効於所長之間或可報恩於未死之日
臣無任

進郊祀慶成詩表

伏覩今月十四日郊祀禮成者親奠璧琮始見天地兼

陳祖宗六廟之典參用漢唐三代之文夷夏來同人神
允答臣某中賀恭惟皇帝陛下聿追來孝對越在天外
修神考之文章內服文母之慈儉四方觀禮百辟宅心
雪止風恬驗神祇之來饗雲黃歲美知豐凶之在天臣
以藝文入侍帷幄考事而知天意陳詩以達民言雖無
足觀亦各其志臣無任瞻天望聖慚懼屏營之至所撰
郊祀慶成詩一首謹繕寫陳表上進以聞

謝除兩職守禮部尚書表

伏蒙聖恩除臣端明殿學士兼翰林侍讀學士守禮部
尚書者衰年自引久抱此心異數併加實為非意辭不
獲命愧何以堪臣軾中謝竊惟以殿命官本緣麟趾之
舊因時脩廢近正金華之名歷代所榮於今為甚自元
豐之末官制以來若非身兼數器之人未有名冠兩職
之重而況秩宗之任邦禮是司豈臣迂愚所當兼領此
蓋伏遇太皇太后陛下憂深社稷慮極安危求忠臣於
愚直之中論治道於文字之外知臣難進而易退或非

患失之鄙夫故授以禮樂清閒之司便專於論說琢磨之事此恩難報願輸歲月之勤度已所宜終遂江湖之請臣無任

又

備負西學已愧空疎易職東班尤驚忝冒遂領宗卿之事併為儒者之榮臣軾中謝始臣之學也以適用為本而恥空言故其仕也以及民為心而慙尸祿乃者屢請治郡兼乞守邊欲及殘年少施實効而有志莫遂負愧

何言今乃以文字為官常語言為職業下無所見其能
否上無所考其幽明循省初心有覲面目故於拜恩之
日少陳有益之言孔子曰一言可以興邦而孟子亦曰
一正君而天下定昔漢文帝悅張釋之長者之言則以
德化民輔成刑措之功而孝景帝入晁錯數術之語則
以智馭物馴致七國之禍乃知為國安危之本祇在聽
言得失之間恭惟皇帝陛下即位以來學如不及問道
八年寒暑不廢講讀之官談王而不談霸言義而不言

利八年之間指陳文理何啻千萬雖所論不同然其要
不出六事一曰慈二曰儉三曰勤四曰慎五曰誠六曰
明慈者謂好生惡殺不喜兵刑儉者謂約己省費不傷
民財勤者謂躬親庶政不過聲色慎者謂畏天法祖不
輕人言誠者謂推心待下不用智數明者謂專信君子
不雜小人此六者皆先王之陳迹老生之常談言無新
奇人所忽易譬之飲膳則為穀米羊豕雖非異味而有
益於人譬之藥石則為耆朮參苓雖無近効而有益於

命若陛下信受此言如御飲膳如服藥石則天人自應
福祿難量而臣等所學先王之道亦不為無補於世若
陛下聽而不受受而不信信而不行如聞春禽之聲秋
蟲之鳴過耳而已則臣等雖三尺之喙日誦五車之書
反不如醫卜執技之流簿書奔走之吏其為尸素死有
餘誅伏望陛下一覽臣言少留聖意天下幸甚

謝賜對衣金帶馬狀二首

蒙恩賜衣一對金帶一條并魚袋金鍍銀鞍轡馬一匹

服官莫篚響動佩章國士効牽光生羈策伏以三賜之
重莫隆於車馬五采之貴兼施於衣裳汝必有功服之
無斃而臣衰年弱幹固難強於馳驅枯木朽株本不願
於文繡寵加意外愧溢顏間此蓋伏遇皇帝陛下因能
任官稱物平施操名器以勵士上有誠心正銜勒以馭
人下無遺力臣敢不思稱其服益勵厥躬雖愧立朝乏
能言之近用猶希辨道輸老智於暮年臣無任

又

蒙恩賜衣一對金帶一條并魚袋金鍍銀鞍轡馬一匹
服章在笥賁及衰殘銜勒過庭喜先徒御伏以物生有
待天施無窮草木何知冒慶雲之渥采魚鰕至陋借滄
海之榮光雖若可觀終非其有妻孥相顧驚屢致於匪
頌道路竊窺或反增於指目此蓋伏遇太皇太后陛下
聰明齊聖陳錫載周含垢匿瑕而察於求賢卑宮菲食
而侈於養士士豈輕於千里念非其人言有重於兼金
當思所報臣無任

笏記二首

榮兼兩職寵與六卿豈伊衰朽之餘有此遭逢之異此
蓋伏遇太皇太后陛下坤元利正天造無私靡求備於
一人將曲成於萬物文章小技縱有效於涓埃草木微
生終難酌於雨露

又

陞榮祕殿列職西清併此光華付之衰朽此蓋伏遇皇
帝陛下剛健純粹緝熙光明曲搜已棄之材將建無窮

之業顧慙淺陋將何補於聖明惟有朴忠誓不回於生
死臣無仕

定州謝到任表

兵民重寄本禦侮以折衝疆場久安但坐嘯而畫諾才
微祿厚恩重命輕臣軾中謝伏念臣一去闕庭三換符
竹坐席未暖召節已行筋力疲於往來日月逝於道路
未經周歲復典兩曹朝廷非不用臣愚養自不安位所
宜竄逐更冒寵榮此蓋伏遇皇帝陛下離明正中乾健

獨運追述東朝之遺意收此散材眷言西學之舊臣付之善地致此衰朽尚未棄捐臣敢不勤卹民勞密修邊備苟無大過以及暮年漸還魚鳥之鄉以畢桑榆之景臣無任

慰正旦表

嗣歲將興雖有作新之慶舊穀既沒共深追遠之思凡在照臨舉增懷慕臣軾中謝恭惟皇帝陛下道躋堯禹行比騫參方受圖於二朝明發不寐念御簾於雙日孝

思奈何幸寬罔極之哀少副有生之望臣限以官守不獲躬詣闕庭臣無任

謝賜歷日表

夙頒溫詔寵拜新書吏得承宣民知早晚臣軾中謝臣聞言天道者有數故閏以正時訓農事者在人則王無罪歲豈獨典常之舊必存忠利之心恭惟皇帝陛下輔相財成聰明時憲居德刑於冬夏意與天同暨聲教於朔南責在臣等敢不時使薄斂思患預防勤卹鰥孤幸

流亡之盡復兼明威惠庶戎夏以皆安臣無任

慰宣仁聖烈皇后山陵禮畢表

恭聞今月七日大行宣仁聖烈太皇太后山陵禮畢者
日月有時義當即遠雨露既降思則無窮遙知穆穆之
光尚起皇皇之望臣軾中謝恭惟皇帝陛下道循祖德
德契天心大哉孔子之仁泣然流涕至矣顯宗之孝夢
若平生願寬舜慕之心少副堯封之祝臣限以官守不
獲躬詣闕庭無任瞻天望聖激切屏營之至

慰宣仁聖烈皇后祔廟禮畢表

恭聞今月十七日宣仁聖烈皇后升祔禮畢者反寢而
虞既盡飾終之典宅神於廟益隆追遠之思凡在照臨
舉增悲慕臣軾中謝竊以六朝繼聖並傳家法之餘三
后御簾高出古人之右逮此登配廓然永懷恭惟皇帝
陛下奉順母慈表章坤德四謚哀榮之詔簡策有光數
詩挽餞之音道塗垂涕日月云遂典禮告成願寬無益
之悲少副有生之望臣限以官守不獲躬詣闕庭無任

瞻天望聖激切屏營之至

謝賜衣襖表

十一月九日翰林醫官王宗古至伏蒙聖慈傳宣存問
賜臣等勅及初冬衣襖者齊官三服已寬卒歲之憂漢
札十行更佩先春之煖恩均吏士聲動華夷臣軾中謝
伏以禮著始裘詩歌無褐邊陲更戍本為臣子之常朔
易早寒特軫聖神之念惟德其物豈曰無衣恭惟皇帝
陛下廣運聰明力行恭儉威風旁振方戰栗於天驕溫

詔下融遂流澌於河凍既無功而坐食實有愧於解衣
敢不推廣朝廷之仁益收凍餒申嚴祖宗之法少肅情
媿庶收汗馬之勞以解濡鵠之誚臣無任

到惠州謝表

先奉告命落兩職追一官以承義郎知英州軍州事續
奉告命責授臣寧遠軍節度副使惠州安置已於今月
二日到惠州公參訖者仁聖曲全本欲畀之民社羣言
交擊必將致之死亡尚荷寬恩止投荒服臣軾中謝伏

念臣性資褊淺學術荒唐但信不移之愚遂成難赦之咎迹其狂妄久合誅夷方尚口乃窮之時蓋擢髮莫數其罪豈謂天幸得存此生此蓋伏遇皇帝陛下以大有為之資行不忍人之政湯網開其三面舜干舞于兩階念臣奉事有年少加憐愍知臣老死無日不足誅鋤明降德音許全餘息故使魍魎之馬猶獲蓋帷轂鯨之牛得違刀几臣敢不服膺嚴訓託命至仁洗心自新沒齒無怨但以瘴癘之地魑魅為隣衰疾交攻無復首丘之

望精誠未泯空餘結草之忠臣無任

到昌化軍謝表

今年四月十七日奉被告命責授臣瓊州別駕昌化軍
安置臣尋於當月十九日起離惠州至七月二日已至
昌化軍訖者並鬼門而東驚浮瘴海以南遷生無還期
死有餘責臣軾中謝伏念臣頃緣際會偶竊寵榮曾無
毫髮之能而有丘山之罪宜三黜而未已跨萬里以獨
來恩重命輕咎深責淺此蓋伏遇皇帝陛下堯文炳煥

湯德寬仁赫日月之照臨廓天地之覆育譬之蠕動稍
賜矜憐俾就窮途以安餘命而臣孤老無託瘡癘交攻
子孫慟哭於江邊已為死別魑魅逢迎於海上寧許生
還念報德之何時悼此心之永已俯伏流涕不知所云
臣無任

提舉玉局觀謝表

臣先自昌化軍貶所奉勅移廉州安置又自廉州奉勅
授臣舒州團練副使永州居住今行至英州又奉勅授

臣朝奉郎提舉成都府玉局觀在外州軍任便居住者
七年遠謫不自意全萬里生還適有天幸驟從縲紲復
齒縉紳臣軾中謝伏念臣才不逮人性多忤物剛褊自
用可謂小忠猖狂妄行乃蹈大難皆臣自取不敢怨尤
會真人之勃興與萬物而更始而臣獨在幽遠最為冥
頑迨茲起廢之初倍費生成之力終蒙記錄不遂棄捐
此蓋伏遇皇帝陛下正位龍飛對時虎變神武不殺豈
非受命之符清淨無為坐獲消兵之福聰明不作邪正

自分使臣得同草木之微共霑雷雨之解臣敢不益堅
素守深念往愆沒齒何求不厭飯蔬之陋蓋棺未已猶
懷結草之忠臣無任

慰皇太后上仙表

伏觀正月十四日大行皇太后遺誥者勸發六宮悲纏
九土奉諱哀殞不知所云臣軾中謝大行皇太后德冠
三朝化行四海獨決大策措天下於泰山之安退避東
朝復明辟為萬世之法奄終壽祿莫曉天心恭惟皇帝

陛下仁孝自天哀傷過禮惟聖達節豈復行曾閔之難以民為心則當法舜禹之大願少寬於追慕庶下答於臣民臣以外郡居住不獲奔赴闕庭無任哀痛隕越之至

代普寧王賀冬表

七日来復陽既進而歲功成八風不姦樂已調而君道得惟聖在御與天合符恭惟皇帝陛下嗣宇洪基丕承先志法小毖以求助期既醉之太平淵默臨朝順陽道

之消長清淨為治俾物類以昭蘇受福無疆成功不宰
臣猥以暗弱仰荷誨憐敢先百辟之朝以祝萬年之壽

謝御膳表

臣伏蒙聖恩特賜寬假將理今月七日又再蒙中使臨
賜御膳問其治療之增損督以朝參之日辰臣下履淵
冰上負芒刺蹄涔雖小能延兩耀之光寸草何知莫報
三春之澤正使豚魚幽陋木石堅頑亦將激勵忘軀奔
走赴職而臣尚有無厭之請敢守不移之愚在法當誅

原情可憫實以負薪之疾積有歲時勿藥之祥恐非旦
夕終願江淮之一郡以安犬馬之餘生尚冀此身未填
溝壑期於異日別効涓埃

代滕達道景靈宮奉安表

衣冠出遊巍乎宮闕之盛祖考來格燦然日月之明新
禮光前彌文範後繼以作解之雷雨仍收繪像之子孫
聳觀華夷淪浹枯朽竊以祀無豐疎祭不欲昵自仁率
親故同宮而合享惟聖作則實考古而便今庶民子來

五福交應蔚山河之增氣紛嶽瀆以來朝仙木蟠根五
聖既聯於龍衮靈芝擢秀九莖復出於齋房皇帝陛下
舜孝格天堯文冠古損益漢唐之典故潤色祖宗之規
摹壽考萬年永作人神之主本文百世共承宗廟之休
臣出守遠方阻觀盛禮會祠壇下莫覩燦然之光留滯
周南竊興命也之嘆

代滕達道湖州謝上表

郡壓五湖城交二水既先世舊居之地亦年少初仕之

邦父老縱觀不謂微臣之尚在吏民感涕共知洪造之
難酬中謝臣間忠臣可使死封疆而不能受無根之謗
議志士本不求富貴而不能安有道之賤貧况臣早蒙
希世之恩常有捐軀之意豈容曖昧略不辨明然疑似
之難知實古今之通患漢文帝賢君也而不能信賈生
之屈尹吉甫慈父也而不能雪伯奇之寃此小人諧夫
所以得志而欺天忠臣孝子所以抱恨而入地况臣結
累朝之深怨無半面之先容而訴章朝聞恩詔夕下歷

數千載唯臣一人此蓋伏遇皇帝陛下妙物言神睿思
作聖謂天蓋遠以窮呼而必聞如日之明雖浸潤而不
受念茲七年之阨收之九死之餘臣敢不更勵初心馴
圖後効老當益壯未甘結草之幽途死且不辭尚欲據
鞍于前殿

同天節功德疏表

伏以累聖儲休上天垂祐乃逢純乾之月肇興出震之
祥恭惟皇帝陛下以堯舜生知之資承祖宗積治之慶

大有上吉天人之助已明既醉太平聖賢之福誠備至
於臣子之私願是為草木之微情幸同海表之民共罄
封人之祝

上皇帝賀正表

東方發律氣迎萬物之新南面受圖禮勤三朝之始惟
聖時憲自天降康恭惟皇帝陛下文武生知聖神天縱
舊邦新命既光啓於前人大德小心以昭事於上帝臣
以塵徒索外領藩符敢傾葵藿之心仰獻松椿之壽

杭州賀冬表二首

月臨天統首冠於三正氣應黃鍾復來於七日君道浸
長陽德光亨恭惟皇帝陛下清明在躬仁孝徧物垂衣
南面天何言而四時成問孝西清日將旦而羣陰伏蠻
夷奔走年穀順成豈惟四海之歡心自識三靈之陰贊
臣祇膺詔命恪守郡符身雖在於江湖顏不忘於咫尺
敢同率土惟祝後天

又

消長有時候微陽之來復賢愚同慶知君子之彙征德
化所加神人並應恭惟太皇太后陛下睿明天縱慈儉
身先振海嶽以不傾地無私載順陰陽之自化天且不
違成功已陋於漢唐論德蓋高於任姒黃雲可望共沾
至治之祥彤史何知莫贊無為之德臣備負法從祗役
海隅東閣拜章阻陪於百辟南山獻壽徒頌於萬年

上皇帝賀冬表

易稱來復蓋知天地之心禮戒無為以待陰陽之定恭

惟皇帝陛下堯仁冠古舜孝通神種德兆民躬行文景
之儉游心六藝灼知周孔之情人既和而歲自豐天不
違而壽無極臣久緣衰病待罪江湖莫瞻北極之光但
罄南山之祝

上太皇太后賀正表

堯歷授時夏正建統氣迎交泰之會祥應重明之朝恭
惟太皇太后陛下道無能名德博而化天人所助本義
易之益謙慈儉不居得老氏之三寶時逢吉日福集清

宮臣職守江湖心馳象魏天威咫尺想聞清蹕之音眉
壽萬年遠奉稱觴之慶

舉黃庭堅自代狀

蒙恩除臣翰林學士伏見某官黃某孝友之行追配古
人瑰瑋之文妙絕當世舉以自代實允公議

英州謝上表

罪盈義絕誅九族以猶輕威震怒行寘一州而大幸驚
魂方散感涕徒零伏念臣草芥賤儒岷峨冷族襲先人

之素業借一第以竊名雖幼歲勤勞實學聖人之道而終身窮薄常為天下之罪人先帝念臣於衆怒必死之中陛下起臣於散官永棄之地恩深報蔑每憂天地之難欺福眇禍多是亦古今之罕有自悲棄物猶欲籲天惟上聖纂宗廟之圖方太母聽簾帷之政招延俊乂登進老成何期章句之謏才使掌絲綸之要職凡一時黜陟進退之衆皆兩宮威禍賞福之公既在代言敢思逃責苟不能敷揚上意尊朝廷於日月之明則何以聳

動四方鼓號令於雷霆之震固當昭陳功罰直喻正邪
豈臣愚敢有於私心蓋王言不可以匿旨當昔之天奪
其魄但謂守官今日之臣肆其言期於必戮賴父母之
深憫免子弟之偕誅罪雖駭於聽聞怒終歸於寬宥不
獨再生於東市猶令尸祿於南州累歲寵榮固已太過
此時竄責誠所宜然瘡痍炎陬去若清涼之地蒼顏素
髮誰憐衰暮之年恩重丘山感藏骨髓此蓋伏遇皇帝
陛下知惟天錫行自生知巍巍繼大聖之神休孜孜盡

二宮之孝養深原心迹曲示哀矜臣實何人思常異衆
在先朝偶脫其誅戮故此日復煩於典刑頑戾如斯生
存何面臣敢不噬臍悔過吞舌知非革再三不改之愆
庶萬一善終之望殺身莫喻敢懷窮困之憂守土非輕
尚畀遐荒之俗儻沐先朝之化永惟結草之忠臣無任

移廉州謝上表

使命遠臨初聞喪膽詔詞溫厚亟返驚魂拜望闕庭喜
溢顏面否極泰遇雖物理之常然昔棄今收豈罪餘之

敢望伏膺知幸揮涕無從中謝伏念臣傾以狂愚遽遭
譴責荷先帝之厚德寬蕭律之重誅投彼遐荒幸逃鼎
鑊風波萬里歎衰病以何堪煙瘴五年賴喘息之猶在
憐之者謂之已甚嫉之者恨其太輕考圖經止曰海隅
其風土疑非人世食有併日衣無禦冬淒涼百端顛躓
萬狀恍若醉夢已無意於生還豈謂優容許承恩而近
徒雖云僥倖實有夤緣此蓋伏遇皇帝陛下道本生知
性由天縱舊勞于外爰及小人之依堪家多艱鑒于先

帝之德奉聖母之慈訓擇正人而與居凡有嘉謀出於
睿斷憫臣以孤忠援寡察臣以衆忌獲愆許以更新庶
使改過天地有造化之大不能使人之再生父母有鞠
育之恩不能全身於必死報期碎首言豈渝心濯於淤
泥已有遭逢之便擴開雲日復觀於變之時此生敢更
求榮處世但知緘默臣無任

謝復賜看墳寺表

名書罪籍慚負明時思念私塋特還舊刹九泉受賜荒

隴生光伏念臣早以空疎叨居近密始終無補愚不自
量恩禮誤加驟及既往一被黨人之目上遺先臣之憂
舊恩已移沒齒何覲豈謂詔書一出舊物復還山隴絕
芻牧之虞松檟變焦枯之色骨肉感涕里巷咨嗟伏遇
皇帝陛下性仁無私聖孝不匱覽二帝初潛之地動一
夫失所之懷號令所加存歿咸賴臣衰病已久報國之
日不長子孫在前教忠之心未替



東坡全集卷六十九

欽定四庫全書

集部

東坡全集卷七十一

詳校官庶吉士臣謝恭銘

檢討臣何恩鈞覆勘

總校官進士

臣朱

鈐

校對官待詔

臣

胡士震

謄錄監生

臣

李崇實

欽定四庫全書

東坡全集卷七十

宋 蘇軾 撰

啓四十三首

謝館職啓

試言無取錫命過優進貽朋友之譏退有簡書之畏覲
顏就列撫已若驚國家取士之門至多而制舉號為首
冠育才之地非一而冊府處其最高觀其所以待之蓋
亦可謂至矣知寶玉璫璵難得而易毀故篋櫝以養其

全知梗楠豫章積歲而後成故封殖以待其長施等天
地恩均父師恭惟先帝臨御以來四十二載所擢賢良
方正之士十有五人其志莫不欲舉明主於三代之隆
其言莫不欲措天下於泰山之固大則欲興禮樂以範
來世小則欲操數術以馭四夷然而進有後先名有隱
顯命有窮達時有重輕或已踐廟堂之崇或已登侍從
之列或反流落於遠郡或尚滯留於小官或死生之乖
睽已為陳迹或擯斥於罪戾僅齒平民雖曰功名富貴

所由之塗亦為毀譽得喪必爭之地名重則於實難副
論高則與世常疎故雖絕異之資猶有不任之懼軾之
內顧豈不自知性任己以直前學師心而無法自始操
筆知不適時會宗伯之選掄疾時文之靡弊擢居異等
以風四方不知滿溢之憂復玷良能之舉負賢者所難
之任爭四海欲得之求其為蠢愚可為危慄是以一參
賓幕輒蹈危機已嘗名挂於深文不自意全於今日而
况大明繼照百度惟新理財訓兵有鞭笞戎狄之志信

賞必罰有追述祖宗之風凡用人歷試其能苟敗事必
誅無赦此太平可待之日豈不肖兼容之時而乃度越
賢豪曲收微賤縱不能力辭而就下亦當知非分以自
慙此蓋伏遇某官志在斯民仁為己任欲辦大事務兼
寸尺之長將求多聞故引涓埃之助致此忝冒有踰等
倫欲報無緣將何望於頑鄙遇寵知懼庶不至於情媿

賀韓丞相啓

右軾啓伏審誕膺策命首冠輔臣四方聳觀萬口同慶

天下幸甚天下幸甚自古在昔治少亂多夫天將欲措
世於大安必有異人之間出使民莫不回心而向道類
非俗吏之所能方陋漢唐將追堯舜洪惟上聖之后眷
求一德之臣謂莫如公遂授以政付八音於師曠孰敢
爭能捐六轡於王良坐將致遠引領以望惟日為年恭
以昭文相公全德難名巨才不器疊疊申伯之望堂堂
漢相之風出入三朝險夷一節叢爾種羌之叛命慨然
當宁以請行威聲所加臙穢自屏淮蔡既定而裴度相

徐方不回而召虎歸縱復遺種龍荒遊魂沙海譬之癰
疥豈足爬搔必將訓兵擇帥而授之規摹積穀堅城而
磨以歲月破斧之惡四國實願周公之亟還折箠以鞭
赤眉無煩鄧禹之久外天下是望豈惟一人即日邊徼
苦寒台候何似伏冀為國善調寢興謹奉啓起居

荅曾學士啓

伏審祇奉詔恩榮升冊府允厭朝論增輝士林伏惟慶
慰恭以聖神在御政化惟新顧籲俊之無方豈拔賢而

待次賤如莘野猶為席上之珍遠若傳巖盡入彀中之選而况圭璋之質近生閎閎之家固宜首膺寤寐之求於以助成肅雍之化府判學士天資粹美儒術講明向屈處於下僚蓋避嫌而自晦屬文子之請老察少翁之最賢撫念老成聿求義訓豈獨褒崇之盛典固將樂育於英才自顧庸虛獲聯齋舍忽捧書詞之辱並知謙德之光喜愧于心踟躕無措

賀歐陽少師致仕啓

伏審抗章得謝釋位言還天眷雖隆莫奪已行之志士
流太息共高難繼之風凡在庀庥共增慶慰伏以懷安
天下之公患去就君子之所難世靡不知人更相笑而
道不勝欲私於為身君臣之恩係縻之於前妻子之計
推荷之於後至於山林之士猶有降志於垂老而况廟
堂之舊欲使辭祿於當年有其言而無其心有其心而
無其決愚智共蔽古今一塗是以用捨行藏仲尼獨許
於顏子存亡進退周易不及於賢人自非智足以周知

仁足以自愛道足以忘物之得喪志足以一氣之盛衰
則孰能見幾禍福之先脫屣塵垢之外常恐茲世不見
其人伏惟致政觀文少師全德難名巨材不器事業三
朝之望文章百世之師功存社稷而人不知躬履艱難
而節乃見縱使耄期篤老猶當就見質疑而乃力辭於
未及之年退託以不能而止大勇若怯大智如愚至貴
無軒冕而榮至仁不導引而壽較其所得孰與昔多軾
受知最深聞道有自雖外為天下惜老成之去而私喜

明哲得保身之全伏暑向闌台候何似伏冀為時自重
少慰輿情

賀韓丞相再入啓

伏覩詔書登庸舊德傳聞四海歡喜一辭竊以君臣之
間古今異道任法而不任人則責輕而憂淺庸人之所
安任人而不任法則責重而憂深賢者之所樂凡吾君
所以推心忘已一切不問而聽其所為蓋其後必將責
報收功三年有成而底於至治自非量足以容物智足

以知人強足以濟艱難勇足以斷取舍則何以首膺民
望力報主知恭惟史館相公忠誠在天德望冠世如乾
之中正挺然而純粹精如坤之六二隤然而直方大更
練三朝之用舍出入四方之險夷疲民系心有識引領
必將發其蘊蓄以次施行始緩獄以裕民終措刑而隆
禮軾登門最舊荷顧亦深喜忭之懷實倍倫等

密州到任謝執政啓

蒙恩授前件差遣已於今月三日赴任訖帶山負海號

為持節之邦多病無功久在散材之目授非所稱愧靡
自任矧茲願治之辰方以求賢為急宜得敏銳兼人之
器以副屬精更化之懷如軾者天與愚忠家傳朴學議
論止於汙俗交遊謂之陳人出佐郡條荐更歲籥雖僅
脫網羅之患然卒無毫髮之稱豈伊寵榮偶及衰鈍此
蓋伏遇某官股肱元聖師表萬邦欲隆太平極治之風
故開兼收並採之路重使一夫之不獲特捐支郡以見
收荷恩至深論報何所謹當鐫磨朽鈍簪策疲駕雖無

望於功名庶少逃於罪戾過此以往未知所裁

荅楊屯田啓二首

伏承枉顧寵示長書禮數過隆既匪妄庸之稱文詞深厚足為衰拙之光反復究觀愧汗交集伏惟通判屯田學深經術名重薦紳頃者劔外屈臨百里之間已是部中受賜一人之數豈伊幸會復此逢迎聽其言信仁人之溥哉居是邦蓋大夫之賢者欲報瓊瑤之貺適苦簿書之煩言之不文永以為好

又

向者不遺特蒙枉顧愧無琴瑟旨酒以樂我嘉賓但喜
直亮多聞真古之益友謂將繼此而得見豈意闕然而
有行伏讀誨音惟知感歎伏惟通判屯田才猷通敏學
術深純非獨東州杞梓之珍將為清廟璠璵之寶暨臨
邊服行履要津而軾早以空疎加之衰病不緣曠官而
罷去則當引分以歸耕自茲恐遂有出處之疎故臨紙
不能無悵惘之意惟祈自重少副下情

謝監司薦舉啓

猥以庸虛過蒙知遇既免尤譴復加薦論自省孤危加之衰病生而賦朴野之性愚不識禍福之機但知任已以直前不復周防而慮後動觸時忌言為身災擠而去之則為有功引而進之亦或招悔自非不以利祿為意而以仁厚為心顧茲鈍頑誰肯收錄伏惟某官時望至重主知已深方將長育於羣材專務掩覆於小過憐其謀身之甚拙進絕望而退無歸知其為政之雖迂歲有

餘而日不足特矯世俗借之齒牙軾敢不祇畏簡書益
自修飭豈云報德苟不辱知過此以還未知所措

徐州謝兩府啓

移守河中已愧超陞之異改臨泗上仍叨藩鎮之雄既
見吏民周覽風俗地形襟要當東南水陸之衝民食艱
難正春夏旱蝗之際宜得一時之循吏以安千里之疲
民如軾者才不逮人學非適用冒塵策府自知拙直之
難安屢乞守符意謂苟全之善計然自往來三郡首尾

七年足蹈危機僅說風波之險心存吏役都忘學術之源既未決於歸耕敢復求於善地伏遇某官權衡萬物高下一心碩曠悍堅實費陶鎔之力散材踈惡徒施封殖之恩謹當簞策疲駑鐫磨朽鈍上酬天造次答已知

賀呂副樞啓

伏審近膺告命入總樞機中外聳觀朝廷增重伏惟慶慰竊以古之為國權在用人德厚者輔其才而名益隆望重者無所為而人自服是以淮南叛國先止謀於長

孺汾陽元老尚改觀於公權樽俎可以折衝藜藿為之不採哀此風流之莫繼久矣寂寥而無聞天亦厭於凡才上復思於舊德恭惟樞密侍郎性資仁義世濟忠嘉豈惟清節以鎮浮固已直言而中病出領數郡若將終身小人謂之失時君子意其復用迨茲顯拜夫豈偶然然而荷三朝兩世之恩當春秋賢者之責推之不去凜乎其難進伯玉而退子瑕人皆望於門下烹桑羊而斬樊噲公無愧於古人莫若盡行疇昔之言庶幾大慰天

下之望軾登門最舊稱慶無緣踊躍之懷實倍倫等

賀趙大資致仕啓

伏審抗章得謝奉冊言還搢紳聳觀閭里相慶竊謂富貴不為至樂功名非有甚難樂莫樂於還故鄉難莫難於全大節歷數當今之卿相或寓他邦究觀自古之忠賢少有完傳錦衣而夜行者多矣狐裘而羔袖者有之至若百行渾圓五福純備當世所羨非公而誰恭惟致政大資少保道心精微德望宏遠無施不可尤高臺諫

之風所臨有聲最宜吳蜀之政才不究於大用命乃係
於生民與時偕行不可則止見故人而一笑綽有餘歡
念平生之百為一無可恨方將深入不二獨遊無何默
追絜可之風坐致喬松之壽軾荷知有素貪祿忘歸慕
鸞鵠之高翔眷樊籠而永歎傾頌之素數寫莫窮

答陳齋郎啓

伏審祇膺寵命榮踐亨塗拜慶庭闈溢歡聲於觀者馳
書士友挾華藻之燦然顧此衰羸實難當捧伏惟齋郎

天資深茂學術淹通經行兩純窮達一操久困有司之
尺度退從老圃於丘園陋彼素餐是聞也非達也凜然
遺直惟有之則似之假道一官權輿千里幅巾藜杖願
為二老之風流甲第高門坐看諸郎之富貴欣頌之至
筆舌難周

賀文太尉啓

伏審孚號揚庭臨軒遣使出節少府授鉞齋壇夷夏聳
觀兵民交慶蓋功業盛大則極名器而後稱惟德度宏

遠故舉富貴而若無蔚為三世之宗臣豈獨一時之盛事恭惟留守文太尉道本天合德為人師信及三川之豚魚威加兩河之草木身任休戚言為重輕始若留侯弱冠而遇高祖晚同尚父黃髮而亮武王既奉冊書益新民聽方將威懷北虜係頸長纓約束河公軌流故道然後入調伊傳之鼎歸躡松喬之游輿論所期斯言可必軾謫官有限趨侍無緣踴躍之心宣寫難盡

登州謝兩府啓

右軾啓蒙恩授前件官已於今月十五日到任上訖者
迂愚之守沒齒不移廢逐之餘歸田已幸豈謂承宣之
寄忽為枯朽之榮眷此東州下臨北徼俗習齊魯之厚
迹皆秦漢之陳賓出日於麗譙山川炳煥傳夕烽於海
嶠鼓角清閒顧靜樂之難名笑妄庸之竊據此蓋伏遇
某官股肱元聖師保萬民才全而德不形任重而道愈
遠謂使功不如使過而觀過足以知仁特借齒牙曲成
羽翼軾敢不服勤簿領祇畏簡書策蹇磨鉛少荅非常

之遇息黥補劓漸收無用之身過此以還未知所措

謝中書舍人啓

右軾啓蒙恩授前件官者起於貶所未及暮年擢置周
行遽參法從省躬無有被寵若驚竊惟人材進退之間
實為風俗隆替之漸必欲致治在於積賢雖一薛居州
齊言不能移楚而用范武子晉盜可使奔秦崔琰進而
廉儉成風楊綰用而淫侈改度誠國是之先定雖民散
而可收拔茅茹者以彙而征附馬棧者必先其直用舍

既見好惡自明人知所趨勢有必至今朝廷方講當世之務力追前代之隆雖改定法令足以便事而未足以安民寬弛賦役足以安民而未足以成俗是以登進耆老搜求雋良將使士知向方民亦有耻如軾者山林下士軒冕棄材少而學文本聲律雕蟲之技出而從仕有狂狷嬰鱗之愚溝中不願於青黃變下無心於宮徵誤蒙收拾已出優恩荐履禁嚴殊非素望此蓋伏遇某官德配前哲望隆本朝名重圭璋上助廟堂之用言為著

蔡下同卿士之謀餘論所加虛名增重知丹心之尚在
憐白首之無歸特借寵光以寬衰病任隆才下恩重報
輕直道而行恐非所以安愚不肖之分充位而已又不
足以解卿大夫之憂蚤夜以思進退惟谷恐懼戰越不
知所裁

謝翰學士啓

叨奉寵恩擢居禁近任逾器表憂與愧并內自顧於衰
遲宜退安於冗散豈期晚節伏與英遊此蓋伏遇某官

德配先民望隆多士至誠樂與共推人物之評雅量兼
容曲借齒牙之末致茲朽鈍亦踐高華方修問之未遑
遽移書之見及其為感佩難盡敷陳

答試館職人啓

伏承射策玉堂方觀筆陣校文天祿遂秀儒林黨友增
華縉紳共慶國家求賢之道必於閒暇無事之時賢者
報國之功乃在緩急有為之際養之無素則一旦欲用
而何由待以非常則臨事欲辭而不可故納之於英俊

相從之地觀之以世俗不見之書非獨使之業廣而材
成抑將待其資深而望重某官學優而仕行浮於名詞
令從容議論慷慨追還正始文章為之一新傳寫都城
紙墨幾於驟貴得士之喜非我敢私軾衰病侵尋文思
荒落職在翰苑當發策而莫辭識非通儒懼品藻之不
稱過煩臨貺寵以書詞永為巾笥之珍愧乏瓊瑶之報

答李寶文啓

伏審祇奉異恩遠臨全蜀奎文寶訓方入直於禁嚴井

絡提封旋出分於憂顧風猷所暨謠頌率同恭惟知府
寶文望重搢紳材宜廊廟譬之金石蓋闔然而日彰浩
若江河固窮之而益遠西南之俗信服已深民物子來
氣復岷峨之舊舟車雲集惠通秦楚之商曾未下車已
聞報政軼倦游滋久寤寐懷歸空詠甘棠之思莫展維
桑之敬悵焉永望言不寫心

答王欽臣啓

伏審祇奉明綬特膺異選以高才望冊府以令德正僕

臣側聞除書大慰輿論伏惟太僕學士文鳴早歲學配
前人豫章雖老於中林瑚璉終升於清廟萬事不理問
伯始而可知三篋雖亡得安世而何患清塗方踐遠業
難量愧修慶之未皇辱移書之見及感佩之至但切下
懷

答彭舍人啓

伏審顯膺宸命進直掖垣除目播騰輿情欣屬國家董
正百官之治聿追三代之隆用事考言因名責實然而

憲臺省閫無預於文詞儒館學宮不關於政理惟此六
押之任要須二者之長非該通經術則不足以代王言
非曉達吏方則不足以分省事是為文士之極任豈止
時人之美談果有真才來應妙選伏惟某官道師古始
識造精微學窮游夏之淵源文列馬班之伯仲自期甚
厚所得實多射策決科嘗魁天下之士犯顏逆指有古
名臣之風粵從言動之司亟掌絲綸之美璠璣美質豈
獨一時宗廟之華杞梓異材固為後日棟梁之用軾備

員法從竊庇餘光聊陳輿誦之言少答函封之辱其為
欣佩莫究頌言

謝賈朝奉啓

右軾啓自蜀徂京幾四千里攜挈去國蓋二十年側聞
松楸已中梁柱過而下馬空瞻董相之陵酌以隻鷄誰
副橋公之約宦游歲晚坐念涕流未報不貲之恩敢懷
盍歸之意常恐樵牧不禁行有雍門之悲雨露既濡空
引太行之望豈謂通判某官政先慈孝義篤友朋首隆

學校之師儒次訪里閭之耆舊自嗟來暮不聞拔薤之
規尚意神交特致生芻之奠父老感歎桑梓光華深衣
練冠莫克垂洟於墓道昔襦今袴尚能鼓舞於民謠仰
佩之深力占難盡

賀范端明啓

右軾啓恭承明詔追錄舊勲名陞祕殿之嚴實遂安車
之養仍惟餘澤以及後昆聞命以還有識相慶竊謂死
生之事聖賢有不能了父子之際古今以為難言方其

犯雷霆於一時豈意收功名於今日惟天知我絕口不言偉事發之相重非人謀之所及恭惟致政端明學士至誠格物隱德在人弼亮四世如畢公壽考百年如衛武獨立不懼舍之則藏惟有青蒲之言尚在金縢之匱白日一照浮雲自開坐使遺民復觀盛事子孫歸沐下萬石之里門君相乞言授三老之几杖更延眉壽永作元龜軾無任歡喜頌詠激切之至

答范端明啓

伏審參稽古樂追述新書琢石鑄金成之有數立均出
度施及無窮搢紳雲集於奉常端冕天臨於便座偉茲
壯觀自我元臣竊以樂之盛衰寄於人之存否秦漢以
下鄭衛律行雖喜三雍之成旋遭五胡之亂平陳之後
粗獲雅音天寶之中遂雜胡部道喪久矣孰能起之獨
求三代之遺聲允屬四朝之舊德恭惟致政端明丈人
耄期稱道直亮多聞進不謀安昔既以身而徇義退猶
憂國今推所學以及人豈惟盡力於考音至復傾家而

制器蓋事關於治忽必幽贊於神明得商頌十二篇於周太師雖賢者之事也獲古磬十六枚於健為郡豈偶然而已哉軾本非知音之人空荷移書之辱究觀累日喜愧兼懷徒誦詠於再三豈發明於萬一

杭州謝執政啓

右軾啓小器易盈宜處不爭之地大恩難報終為有愧之人到郡浹旬汗顏數四湖山如舊魚鳥亦怪其衰殘爭訟稍稀吏民習知其遲鈍雖尚嬰於寵劇庶漸即於

安閒顧此蠢愚亦蒙徽倖此蓋伏遇某官輔世以德事
君以仁嘉善而矜不能與人不求其備故令狂直得保
始終措步武於夷途收桑榆之暮景軾敢不欽承令德
推本上心政拙催科自占陽城之考姦容獄市敢師齊
相之言庶寡悔尤少償知遇

答杭州交代啓

右軾啓罷直禁中本緣衰病分符浙右更竊寵榮既尋
少壯之舊遊復繼老成之前躅養病卧治之所蒙成坐

嘯之餘顧此鈍頑實為忝昧伏惟知府待制宏才緯俗
雅望鎮浮神馳方切於望塵心照已先於傾蓋借之餘
潤成此虛名滕大夫之才豈堪治劇楚令尹之政或許
告新望見有期瞻依愈切

答莫提刑啓

右軾啓得請江湖雖適平生之願剗煩獄市豈堪老病
之餘賴茲德大而有容愍其心勞而愈拙故於始至借
以一言此蓋伏遇提刑某官威肅列城德懷雅俗雖在

按臨之屬部不忘宿昔之交情豈獨敦忠厚之風抑以
增衰朽之重其為感忤未易名言

答王明州啓

伏審奉詔牧民消辰莅事教條清簡曾無顧指之勞吏
下肅承皆有心服之敬風聲所暨隣境為先伏惟知府
龍圖迪哲而文剛中莫屈大辯若訥耻為利口之言小
智自私誰識仁人之勇道不容於羣枉身乃獲於退安
回觀爭奪之塗日有榮枯之變坐嘯之樂勿以語人強

食自顧猶當為國

謝生日詩啓一首

蓬矢之祥雖世俗之所尚蓼莪之感迨衰老而不忘豈
謂某官意重瓊瑤文成黼黻推仁心而錫類出妙語以
噓枯攝提正於孟陬已光初度月宿直於南斗更借虛
名永惟難報之珍但結無窮之好

賀林待制啓一首

伏審圖舊聖時陞華法從僉言諧允有識歎咨萬木歲

寒配喬松於巨栢衆星夜艾凜明月與長庚斧藻昌朝
領袖後進傳聞四遠歡喜一詞恭惟某官名重弱齡望
高晚節文章爾雅蓋西漢之餘風惴惴無華亦東京之
循吏凡閱四朝而後用獨為三館之老臣著書已成特
未寫之琬琰立功何晚會當收之桑榆軾交舊最深慰
喜良甚尺書為賀鄙志莫宣

賀蔣發運啓

伏審上計入覲拜恩言還擁節東南上寄一方之休戚

考圖廣內示將大用之權輿凡在庀庠舉增忤躍恭惟
某官受材秀傑秉德純忠蔚然西漢之文深厚爾雅展
矣東京之吏悃悃無華雖已得正法眼藏於大祖師猶
有一大事因緣於當來世固將入踐卿相坐致功名以
斯道而結主知隨所寓而作佛事某竄流已久衰病相
仍方稱慶之未皇忽移書之見及欣感之幸筆舌難宣

謝制科啓

右軾啓今月某日蒙恩授前件官者臨軒策士方搜絕

異之材隨問獻言誤占久虛之等忽從佐縣擢與評刑
內自顧於無堪凜不知其所措恭惟制治之要惟有取
人之難用法者畏有司之不公故舍其平生而論其一
日通變者恐人才之未盡故詳於採聽而畧於臨時茲
二者之相形顧兩全而未有一之於考試而掩之於倉
卒所以為無私也然而才行之迹無由而深知委之於
察舉而要之於久長所以為無失也然而請屬之風或
因而滋長此隋唐進士之所以為有弊魏晉中正之所

以為多姦惟是賢良茂異之科兼用考試察舉之法每
中年輒下明詔使兩制各舉所聞在家者能孝而恭在
官者能廉而慎臨之以患難而能不變邀之以寵利而
能不回既已得其行已之大方然後責其當世之要用
學博者又須守約而後取文麗者或以用寡而見尤特
於萬人之中求其百全之美凡與中書之召命已為天
下之選人而又有不可測知之論以觀其默識之能無
所不問之策以效其博通之實至於此而不去則其人

之可知然猶使御史得以求其疵諫官得以考其素一
陷清議輒為廢人是以始由察舉而無請謁公行之私
終用考試而無倉卒不審之患蓋其取人也如此之密
則夫不肖者安得而容軾才不迫人少而自信治經獨
傳於家學為文不願於世知特以饑寒之憂出求斗升
之祿不謂諸公之過聽使與羣豪而並遊始不自量欲
行其志遂竊俊良之舉不知氣力之微論事迂闊而不
能動人讀書疎畧而無以應敵取之甚愧得而益慙此

蓋伏遇某官德為世之望人位為時之顯處聲稱所被
四方莫不奔趨議論一加多士以為進退致茲庸末亦與
甄收然而志卑處高德薄寵厚歷觀前輩由此為致君
之資敢以微軀自今為許國之始過此以往未知所裁

賀楊龍圖啓

右軾啓伏審新改直職擢司諫垣傳聞邇遐竦動觀聽
咸謂國家之鉅福乃用諫諍之真才必能深言以補大
化方今朝廷之上號為無諱而太平之美終不能全臺

諫之列歲不乏人而衆弊之原猶或未去豈聽之者徒能容而不能用言之者但為名而不為功歷觀古人之效忠皆因當世而用智不務過直期於必行右尹子草因墳典而道祈招之詩左師觸龍語饘粥而及長安之質徒盡拳拳之意不求赫赫之名此仁人及物之休功忠臣愛君之至分伏自頃歲所更幾人席未暖而輒遷踵相躡而繼去一身之譏固足以免矣而積歲之病當使誰去之恐習慣以為常遂因循而不振雖在僻陋顧

常隱憂以為必得朴忠憂國之人而又加以辯智得君之術言苟獲用國其庶幾伏惟諫院龍圖才雄於世而常若不勝節過於人而未嘗自異素練邊事深知兵驕頃持銓衡實識官冗必將舉大體而不論小事務實效而不為虛名軾最蒙深知愧無少補方傾耳以聽願續書諫苑之篇若有待而言或能著爭臣之論阻以在外無由至門踴躍之懷實倍倫等

鳳翔到任謝執政啓

右軾啓違去軒屏忽已改歲向風瞻戀何翅饑渴前月十四日到任翌日尋已交割訖軾本凡材繆承選取忽從州縣便與賓佐捫躬自省豈不媿幸伏自到任已來日夜厲精雖無過人庶幾寡過伏惟昭文相公素所獎庇曲加搜揚既蒙最深之知遂有自重之意所任僉署一局兼掌五曹文書內有衙司最為要事編木檄竹東下河渭飛芻輓粟西赴邊陲大河有每歲之防販務有不蠲之課破蕩民業忽如春冰于今雖有優輕酬獎之

名其實不及所費百分之一救之無術坐以自慙惟有
署置之必均姑使服勞而無怨過此以往未知所裁

賀吳副樞啓

頃聞休命擢領上都曾安坐之未皇已歡聲之布出即
欲裁問少通勤拳以為不久當有非常之聞是以未敢
輕為率爾之賀逮茲未幾果已如言釋府事之喧繁總
兵擁於禁密傳聞四遠歡喜一詞伏惟某官機畧足以
應無方而有朴忠沉厚之量文華足以表當世而有簡

素質直之風置之於都會則其為效也速而所及者廉
委之於樞機則其成功也遲而所被者廣深惟賢者之
處世皆以得時為至難幸而得之或已老矣今以明公
之至盛正如大川之方增天下方將以未獲之事盡付
於明公明公宜愛此不貲之軀以畢其能事區區之意
言不能勝

答許狀元啓

右軾啓伏以賢俊之士固將有以挾持富貴之來豈能

為之損益昔者在貧賤之辱所有無以異於今一朝居
豪傑之先而人然後知其貴伏惟狀元僉判廷評以粹
美之質負傑異之才自遠方而遊上都以一日而蓋天
下士既望風而知不敵人皆斂衽而謂當然苟非素與
交遊之流安敢輕為賀問之禮不期謙抑過錄庸虛忽
承賤牘之臨皆自聽聞之誤禮非所稱媿靡自任先皇
帝未明求衣久已格於至治洮盥憑几尚不忘於選賢
庸登哲民以遺後聖雖喜車旌之召旋興弓劍之悲臣

予之心遠邇若一即日承已拜命計將就塗念展謁之
何時徒向風而永望謹奉啓陳謝不宣

謝秋賦試官啓

伏以聖人設文章之教本以御民君子在野田之間亦
學為政故知禮樂者可與言化通春秋者長於治人蓋
三代之所常行於六經可以備見事為之制曲為之防
使學者皆能明其心則天下可以運諸掌降及近世折
為二塗凡王政皆出於刑書故儒術不通於吏事惟其

所以治民者固不本於學而其所以為學者亦無施於民遊庠校者忘朝廷讀法律者捐詩賦場屋後進挾聲技以相夸王公大人顧雕蟲而自笑舊學無用古風遂忘終始之意曾不相沿貴賤之間亦因遂闕下之士有學古之志而無學古之功上之人有用儒之名而無用儒之實顧茲媿弊常竊憫嗟苟非當世之大賢孰拯先王之隆典伏惟某官才出間世志存生民曩在布衣能通天下之務旋居要職又為儒者之宗明習政事而皆

有本原守持經術而不為迂闊世之系望上所深知輟
自朝聯付之文柄命題甚易而不肖者無所兼容用法
至寬而犯令者未嘗苟免觀其發問於策足以盡人之
材講求先聖之心考其詩義深悲古學之廢訊以歷書
條任子之便宜訪成均之故事不泥於古不牽於今非
有苛碎難知之文將觀磊落不羈之士使天下知文章
誠可以制治知聲律不足以入官失之者固因而自新
得之者不至於捐舊疇昔所欲於今遂忘軾才無他長

學以自守為文病拙不能當世俗之心奏籍有名大懼
辱賢材之舉翻然如畀之羽翼追逸翮以並遊沛然如
假之舟航臨長川而獲濟偶緣大庇粗遂一名方將區
區於簿書米鹽之間碌碌於塵埃簞楚之地雖識恩之
所自顧力報之末由感懼之懷不知所措

謝韓舍人啓

右軾啓軾聞古者至治之世天子推恩以收天下之望
有司執法以繩天下之姦蓋不推恩則無所兼容不執

法則有所僥倖有司推恩而求名則侵君之權天子執法而責實則失民之望為君者常病於察為臣者又失之寬古之明天子信其臣而不惑於多言故有司執法而無所忌古之良有司憂其君而不卹於私計故天下歸怨而不敢辭況欲選材而置官是將教民而圖任唯所利國豈容樹恩今聖上推不忍之心使賢愚皆遂其所欲而大臣用至明之法使工拙不至於相淆嚮者哀憐老儒故為特奏之令憫惻連坐又開別試之塗此天

下所以詠謨至仁鼓舞盛德君臣之體夫豈同條伏惟
舍人執事為時求材憂國忘己所圖甚遠將深計於安
危自信至明曾不牽於毀譽變苟且依違之俗去浮偽
竄譁之文罷黜俗儒動以干計講通經術得者九人顧
茲小才偶在殊選惟天子推恩如此之厚惟大人執法
如此之堅將天下實被其休功豈一夫獨遂其私願感
荷激切不能自勝

謝王內翰啓

右軾啓竊以取士之道古難其全欲求侔儻超拔之才則懼其放蕩而或至於無度欲求規矩尺寸之士則病其齷齪而不能有所為進士之科昔稱浮剽本朝更制漸復古風博觀策論以開天下豪俊之塗精取詩賦以折天下英雄之氣使齷齪者望而不敢進放蕩者退而有所裁此聖人所以罔羅天下之逸民追復先王之舊迹元臣大老皆出此塗伏惟內翰執事天材俊麗神氣橫溢奇文高論大或出於繩檢比聲協句小亦合於方

圓蓋天下望為權衡故明主委之黜陟軾之不肖與在下風顧惟山野之見聞安識朝廷之忌諱軾亦恃有執事之英鑒以為小節之何拘執事亦將收天下之遺才觀其大綱之所在驟置殊等寔聞四方便知大國之選材非顧當時之所悅眇然陋器雖不能勝多士之喧言卓爾大賢自足以破萬人之浮議方將奔走厥職厲精乃心苟庶幾無朝夕之愆以辱知己亦萬一有毛髮之效少答至仁感懼之懷不知所措

潁州到任謝執政啓

入參兩禁每玷北扉之榮出典二邦輒為西湖之長皆
緣天幸豈復人謀惟汝水之名邦乃裕陵之故國人醇
事簡地壤泉甘豈惟暫養於不才抑亦此生之可老恭
惟某官嘉猷經世茂德範時元老廟堂自有權衡之信
餘生江海得同品物之安感佩之私筆舌難既

定州到任謝執政啓

燕南趙北昔稱謀帥之難尺短寸長今以乏人而授幸

此四夷之守忘其一障之乘坐食何功捫心知愧伏念
軾愚忠自信朴學無華孔融意廣才踈訖無成效嵇康
性褊傷物頻致怨憎叨逢聖世之休明未分昔人之憂
患故求散地以養衰年終成命之莫回悼此心之未亮
伏惟某官躬行周孔力致唐虞變和天人方遂萬物之
性虛受海宇固容一介之微眷此餘生實無他望老如
安國既倦北平之遷羣比方回終有會稽之請歸依之
至筆舌奚周

上執政謝獎諭啓

事有服勤此實守臣之職功無可錄遽膺褒詔之榮聞
命惟驚反身自愧伏自河失故道遺惠及於東方徐居
下流受害甲於他郡比緣衆力獲保孤城灑沈澹災無
補洪源之塞增卑培薄僅循下策之施敢圖天聽之卑
乃辱璽書之賜茲蓋伏遇某官左右元聖師保萬民方
以一夫不獲為己羞故衆人皆樂以善告遂緣過聽致
此曲恩某敢不祇服訓詞益修吏職深自策其駑鈍庶

有補於涓埃過此以還罔知所措

上留守宣徽啓

右某啓少年游學方成都樂職之秋壯歲效官復淮陽
卧理之日矧留都之清淨眷幙府之優閒再枉辟書重
收孤迹哀憐廢棄之久誰復肯然綢繆搏俎之歡亦非
偶爾伏惟留守宣徽太尉才高一世望重屢朝體河嶽
之兼容納涓塵而不間衣食有奉已寬盡室之憂道德
照人况復終身之幸其為感激難盡敷陳

東坡全集卷七十

欽定四庫全書

東坡全集卷七十一

宋 蘇軾 撰

啓六十四首

謝制科啓

軾以薄材親承大問論議羣起予奪相乘不意聖恩之
曲加猶獲從吏之殊寵伏讀告命重積震惶嘉其愛君
之心期以克終之譽辭不獲命媿無以堪某生於遠方
性有愚直幼承父兄之餘訓教以強己而力行雖為朝

廷之直臣常欲挺身而許國位卑力薄自許過深言發
譴生事勢宜爾追尋策問之微意實皆安危之大端自
謂不及則曰志勤道遠開其不諱則曰無悼後害竊以
制策之及此又念科目之謂何整其平時之所懷猶懼
不足以仰對言多迂闊罪豈容誅伏以國家取人之科
惟是剛柔適中之士太剛則惡其猖狂不審太柔則畏
其選懦不勝將求二者之中屬之以事固非一介之賤
所或能當某之不才過乃由此然而訐切憤悱為知士

之所不許因循鹵莽又有國之所樂聞使舉世將以從容而自居則天下誰當以奮發而為意此蓋某官羽翼盛時冠冕多士思盡芻蕘之議以明寬厚之風羈危之所恃以為無憂紛紜之所恃以為定論顧惟無似尚辱甄收感恩至深求報無所昔者西漢之盛莫如文景孝武之賢制策所興世稱晁董公孫之對然而數子者頌詠德美而不及其譏刺故三帝者好愛文字而無聞於寬容豈其時君不可為之深言抑其羣臣亦將有所不

悅某才雖不逮時或見容非懷爵祿之榮竊喜幸會之
至

答杭州交代林待制啓

伏審知府鈐轄待制新易節旄光臨督府舊政已孚於
千里先聲坐振於七州軾偶以庸虛適相前後愧無毫
髮之善可紀斯民惟有凋瘵之餘以遺君子即諧瞻奉
尤切詠思

答館職啓

伏審奉詔明廷陞華冊府國有得賢之慶士知稽古之
榮虎觀石渠極諸儒之妙選鰲宮金闕笑方士之遠求
自喜衰年獲觀盛事某官學本自得道惟造深溫故為
君子之儒多聞推益者之友竒字可學知子雲之苦心
亡書復存賴安世之默識不試而用知賢則深軾方此
賜環遽承枉駕沐誨音之已厚愧馳謁之未遑

與潁州運使劉昱啓

衰病倦遊久懷歸意聖神寬假特乞守符條教閱疎溪

湖清遠但坐縻於廩祿顧難繼於賢豪所幸仁明曲垂
存撫特先蒙於顧盼使增重於吏民伏惟運使郎中才
簡上心名高省闕暫屈外臺之寄一蘇右輔之民日望
車塵按臨封部少奉誨言之末足為衰朽之光感佩之
私筆舌難既

揚州到任謝執政啓

擇地而來本非臣子之達節有求必獲足見廟堂之兼
容釋汝潁之清閒當江淮之衝要舊游所樂習俗相諳

已見吏民具述朝廷之意不為條教自然獄市之清此
蓋伏遇某官師保斯民著龜當代折衝禦侮已獲萬人
之英補隙輔疎更收一木之用軾敢不益求民瘼勉盡
鄙才但未歸田之須臾猶思報國之萬一

答晁發運及諸郡啟

衰病交攻已安僻壤寵光荐及復付名邦雖見吏民敢
違條教尚緣大庇使獲少安此蓋伏遇某官忠厚有容
高明畢照樂善忘勢稍霽外臺之威講舊論心曲敦同

榜之好餘人某官忠厚有容通明畢照朝高雅望流風
采之聳聞士誦德言借光華於枯朽致茲踈拙粗免曠
瘼愧展奉之未皇但緘藏之無斂

賀彭發運啟

伏審拜詔十行觀風六路允符公論克振先聲恭承曩
契之隆得與屬城之末瞻依有素感慰居多伏惟發運
吏部年兄士聳英風時推舊德用久淹而未盡才歷試
而愈高船滿潭中行奏韋堅之課錢流地上佇觀劉晏

之能喜抃之深力占難盡

答杜侍郎啟

伏審荐膺天寵榮貳卿曹士友喜於彙征朝廷為之增重
伏惟兵部侍郎溫文亮達宏遠清通直道不回貫今昔而
無愧處躬自厚蹈世俗之所難事愈練而益明用雖晚而
必濟自聞休命實起懦衷遽承問訊之先益佩謙光之過
謝本路監司啟

多病早衰屢有江湖之請誤恩過聽遂分疆場之憂才

無取於折衝愧已深於卧鎮敢緣厚德尚許兼容伏惟
某官名重縉紳望隆中外承宣帝澤民忘流殍之災肅
振臺風吏若親臨之畏顧惟朽鈍得奉教條但交欣悚
之懷莫罄瞻依之頌

上監司謝禮啓

燕南趙北昔為百戰之場地利人和今乃四夷之守觀
累朝之命帥皆一代之名臣豈謂寵榮曲加疲陋顧吏
民之易治幸衰拙之少安此蓋伏遇某官碩德庇民宏

才緯世餘膏所燭常分無盡之光蒙霧而行坐獲不知
之潤眷言朽鈍未遂顛擠勉加策勵之勤少答吹揚之
賜

賀鄰帥及監司冬至啓

月臨天統首冠於三正氣兆黃宮復來於七日候微陽
之協應知君子之彙征伏惟某官碩德庇民傑才經世
踐揚中外之寄益推望實之隆既醉太平實具周詩之
福大有上吉允符羲易之占軼限以守邊未遑稱慶徒

云善頌莫罄鄙懷

賀隣帥及監司正旦啓

新厯既頒蓋履端歸餘之歲羣情交泰正贊陽出滯之
辰恭惟某官厚德鎮浮高名華國非獨疇咨之用已簡
上心更膺難老之祥以符民望官守所限展慶無由欣
頌之深敷陳罔既

答丁連州朝奉啓

七年遠謫不知骨肉之存亡萬里生還自笑音容之改

易久怙颶霧稍習蛙蛇自疑本僭崖之人難復見魯衛之士而況清時雅望令德高標固已聞名而自慙蓋欲通書而未敢豈謂知郡朝奉仁無擇物義有逢時每憐遷客之無歸獨振孤風而愈厲固無心於集菀而有力於噓枯遠移一紙之書何啻百朋之錫過情之譽雖知無其實而愧于中起廢之文猶欲借此言以華其老窮途易感永好難忘

答陳提刑啓

久竄島夷偶未書於鬼錄逃歸空谷固喜聞於足音況
清廟瑚璉之姿為明堂杞梓之用欲聞名而未敢豈流
問之或先恭惟提刑刑部才高一時望重多士魯諸儒
之德業緣飾政刑漢循吏之風流本源經術暫屈雲霄
之步來蘇嶺嶠之民憐遷客之無歸墜尺書而起廢助
其羽翼借以齒牙但憂枯朽之餘難副吹噓之力既感
且忤不知所云

答彭賀州啓

竄流海國脫身羈鬼之林洒掃真祠拜賜散人之號喜
歸田之有漸悼報國之無期方自愧於心顏敢聞名於
左右豈謂某官曲敦雅好深軫窮途賜以尺書借之餘
論溫詞曲盡賢於十部之見臨陋質增華果已五漿之
先餽但慙衰朽虛辱品題敬佩至言永以為好

答臨江軍知軍王承議啓

泮水受成繆膺桑梓之敬海邦畫諾又觀枳棘之栖多
難百罹流年半世恍如昨夢復見故人伏惟知郡承議

居以才稱進由德選淵源師友舊仰鄭公之高歌詠風
流近傳邵父之繼不忘疇昔曲賜拊存豈獨憐衰朽而
借餘光蓋將敦風義以勵流俗感佩之至筆舌難周

答王幼安宣德啓

俯仰十年忽焉如昨間關百罹何所不有頃者海外澹
乎蓋將終焉偶然生還置之勿復道也方將求田問舍
為三百指之養杜門面壁觀六十年之非豈獨江湖之
相忘蓋已寂寥而喪我不謂某官講修舊好收錄陳人

粲然雲漢之章被此枯朽之質欲其洗濯宿負激昂晚
節粗行平生之志少慰朋友之望此意厚矣我心悠哉
如焦穀芽如伏櫪馬非吹噓之所及縱鞭策以何加藏
之不忘永以為好

求婚啓

結褵早歲已聯昆弟之姻親垂白南荒尚念子孫之嫁
娶敢憑良妣徃歎高閣軾長子某之第二子符天質下
中生有蓬麻之陋祖風綿邈庶幾弓冶之餘伏承故令

弟子立先輩之愛女第十四小娘子稟粹德門教成家
廟中郎墳典之付豈在他人太真姑舅之婚復見今日
仰緣夙契祇聽俞音

定州到狀

得請近藩假塗治境即諧披奉預切忻愉

謝交代趙祠部啓

近審新命屈領此邦名實所加吏民交慶夫何駕蹇之
步偶茲糠粃之先雖甚內慙實為大幸恭惟某官清名

肅物雅望在人以博學而濟雄文以高才而行直道久
試蕭生於馮翊猶煩長孺於淮陽眷此東原幾為大澤
尚呻吟之未復豈罷陋之所堪望公之來以日為歲祝
頌之素寫述難周

賀孫樞密啓

伏審對揚綸綍進領樞機道不虛行必賴股肱之力人
惟求舊允符夷夏之瞻恭惟某官德充山甫之將明氣
備孟軻之剛大聲華傾於衆望功業見乎有為擁節常

山遠過長城之備剽繁京兆遂令鳴鼓之稀公議益崇
貴名愈白用致非常之命以圖保大之勲惟時運籌既
壯王猷之塞佇觀秉軸更增帝載之熙某限以郡符阻
趣墻仞欣抃之至徒切下懷

回列郡守倅啓

祇奉詔恩出臨邊寄愧非才之難強託餘庇以少安豈
謂仁私過形存問感佩之至宣寫莫周

賀列郡知通賀冬啓

日旋南極氣兆黃宮竊惟視履之祥宜擁自天之祐未
遑馳問先辱惠音感佩之誠敷述罔既

回列郡守倅賀年啓

新厯既頒羣情交泰過蒙流問祇服寵光永惟嗣歲之
興必享宜民之祿徒深頌咏莫罄敷陳

謝監司啓二首

近審下車輒嘗進記徒欲聞名於將命未遑盡意以占
詞不圖謙光遽錫褒寵感銘既切愧惕并深恭惟某官

以舊德之賢當聖朝之選恩足以濟法義足以理財先聲所臨公議同慶凡繫屬部實有賴於庇庥惟是孤蹤更曲蒙於優借此為過幸豈復勝言

又

伏念傾蓋若故雖自慰於宿心盡言非書故未紓於誠意即膺寵復寶佩謙光退屬紛縈遂疎上記遽叨榮問徒益厚顏恭惟某官造道惟深養氣以直理財不愆於義行法不失其恩竊聆下風倍仰厚德不圖幸會遽隸

屬封吏畏民懷既仰安於明哲心勞政拙庶粗免於譴
訶喜抃至深敷陳莫罄煩猷尚熾參對未期伏冀精頤
別即迅召

賀高陽王待制啓

伏審顯奉恩綸榮更帥閫鎮武垣之衝要聯內閣之高
華公議交俞貴名愈白恭惟某官膺天大任於時有為
發揮才謀更厯事任道能濟而不過事雖難而不辭簡
在聖心遂益柄任峻登祕近之直重易關防之雄有恩

有威方結東人之愛允文允武更紆北顧之憂即觀成
功進陟近輔

賀青州陳龍圖啓

伏審光奉詔書往司留憲漢恩予告暫優三最之勤商
夢懷人方徯巨川之濟於公自計為喜可量伏惟某官
文武憲邦忠嘉致主衆謂老成之託孰逾舊學之賢而
乃力謀退安示有疾病揮金故里雖榮疏傳之歸雅意
本朝日望蕭公之入無由追餞徒切瞻依

謝惠生日詩啓

伏蒙某官以某生辰特貽佳什允也風人之作燦然華
袞之榮自省庸虛惟知愧汗雖大人占斯干之夢喜獲
嘉言而弟子廢蓼莪之篇難忘永慕感佩之素數染莫
周

謝求婚啓

敢議婚姻蓋恃鄉閭之末遂忘門閥亦緣聲氣之同龜
筮既從祖考咸喜伏承令子弟二小娘子慶闡擢秀豈

獨衛公之五長而某第二子某駑質少文庶幾南容之
三復恭馳不腆之幣永結無窮之歡悚抃於懷敷述罔
既

賀正啓

伏以物壯則老肅役所以成歲功否終必傾反復然後
知天意凡在含生之類休有向榮之心恭惟某官履信
體仁秉德直義才無施而不可道得時而愈隆方當彙
征元吉之辰宜享既醉太平之福某限居官守阻候門

牆瞻頌之深敷宣罔既

賀冬啓

伏以候緹室之清宮瞽告以日卜臺觀之黃祿史書有
年共安消長之來以待陰陽之定恭惟某官才猷傑異
道德深醇靖共正直之休順獲天人之助某恪守官次
阻稱壽觴坐馳傾向之心莫罄安榮之遇

賀正啓

伏以葦桃在戶磔攘以餞餘寒椒柏稱觴燔烈以興嗣

歲在時為泰與物咸新恭惟某官德治斯民才高當世
迹難淹於外補望已隆於本朝慶此朋來之辰必有彙
征之福某官守所繫展謁無階頌咏之深數寫難盡

謝孫舍人啓

拜命中宸代言西掖聳聞中外交慶士夫竊惟二聖之
心蓋以多士為急滅烽仆鼓而以將帥為藩垣抵璧捐
金而以公卿為帑廩蓋樽俎有折衝之恃則藜藿無見
採之憂某官瑚璉之才杞梓其用學不專於為己才已

效於臨民穆如清風草木皆靡炳然白日霰雪自消茲
為收拾之儲豈特絲綸之任不遺衰朽過辱紙封永敦
為好之懷深負難酬之作

謝呂學士啓

文學之選人才所難邇無世祿之嫌遠絕茅衡之棄矧
此國家養賢之地豈為儒者竊祿之私某官學古入官
修身以道志本為已行浮於名直諒多聞固可追於益
友文史足用曾不愧於古人果膺選掄益登清要未遑

馳問先辱惠音

答新蘇州黃龍圖啓

伏審光膺詔函移牧吳會先聲所被惠政已孚自顧妄庸敢論疇昔既聯法從之末又竊鄰光之餘金華玉堂帝左右之高選武林茂苑江東南之要藩雖才分闊絕於賢愚而步武差池於先後其為喜幸宜倍等流伏惟某官文秀士林才任國器學已試而可用望久養而益隆偃息均勞叔度莫窺於萬頃治行稱首次公行踐於

三槐潤澤所加迂愚有託辱移書之周厚實借寵於衰
遲銘感之深筆舌難喻

賀提刑馬宣德啓

奉命按刑捧節入境吏民相慶已戴二天之仁衰病自
私獨先一日之雅恭承榮問有激懦衷伏惟某官才映
士林望高朝論治行聳聞於中外家聲洋溢於縉紳眷
三吳之疲民困連年之積潦疇咨明哲宣布厚恩匪惟
凋瘵之獲蘇抑亦庸虛之知勉其為喜幸豈易名言

答曾舍人啓

伏審顯膺制命榮進掖垣風聲所加中外同慶伏以取
才之道自昔為難惟君子之所為固衆人之莫識奢儉
異俗不害徐公之有常用舍皆天孰知令尹之無喜某
官異材秀出博學名家世以文鳴遠繼父兄之業早緣
德進簡在裕陵之心今乃援而進之論者惜其晚矣訓
詞一出皆丹青潤色之文老拙自降有糠粃在前之歎
過蒙寵顧辱示華牋恨無酬德之言徒有得賢之慶感

忤之素寫述難周

答秀州胡朝奉啓

伏審初見吏民首行條教鄰封甚邇欣謠頌之藹然緘牘先蒙愧勞謙之過矣某官望推朝論才映士林用已試於盤根所居見紀政方觀於餘地不令而行某待罪江湖苟安衰病眷言一郡幸擊柝之相聞矜式百為知伐柯之不遠其為欣詠難盡名言

上虢州太守啓

伏審光奉宸恩寵分郡寄惟此山河之勝宜膺師帥之
權凡在庇庥莫不欣抃切以弘農故地號國舊邦周分
同姓之親唐以本支為尹富庶雅高於二陝鶯花不謝
於三川韓公三十一篇風光咸在賈島五十六字景色
如初有洪溜灌溉之饒被女郎雲雨之施四時無旱百
物常豐寶產金銅充仞諸邑良材松栢贍給中都至於
事簡訟稀瀟灑有道山之況魚肥鶴浴依稀同澤國之
風自匪巨賢不輕假守故來者未嘗淹久而優恩已見

遷除非總一路之轉輸則入六曹而侍從前人可考新
命何疑伏惟御府某官學造淵源道升堂奧精祲盡天
人之蘊高明窮性命之微中外屢更功名茂著銅虎暫
淹於百里朱轡聊寄於三堂仰望旌麾俯臨民社共漢
星言而夙駕思承道化乎其民某仕版寒蹤賓僚俗吏
久仰圭璋之望素欽星斗之名豈謂此時獲依巨庇惟
良作牧已興來暮之歌謠有隕自天惟恐別膺於綸綍
無任丹懇倍切馳情

賀年啓二首

效五物以觀雲咸知歲美備八能而合樂益驗人和伏
惟某官進德及時宜民受祿肇履三陽之應求膺百順
之歸未遂披承徒增欣詠

又

三陽應律萬寶向榮永惟視履之祥宜獲自天之祐未
遑展慶徒切頌言

高麗大使遠迎啓

伏審觀光魏闕自忘浮海之勤授館吳都將有披雲之
幸過承謙德先枉華緘感荷之深誦言莫既

副使啓

伏審祇率邦常來修方貢適此海隅之守得瞻使節之
華首辱緘滕過形謙抑其為感忤難盡名言

謝大使土物啓

伏審揚舲造朝弭節就舍歸時事於宰旅方勞遠勤發
私幣於公卿亦蒙見及莫遑辭避但切感銘

謝管設大使啓

鳴鹿食野方主禮之粗陳驪駒在門歎賓歡之莫盡遽辱移書之重益慙為具之疎即遂願言徒增銘佩

副使啓

伏審舍館初定徒馭少休粗接賓歡方愧餽牽之陋曲敦私好特班琛貢之餘感佩於懷愧忤無量

謝副使啓

伏以裴回弭節必忘靡盬之勤笑語飛觴深懷不腆之

愧過承榮問益荷謙勤感佩於衷筆舌難盡

罷登州謝杜宿州啓

桑榆晚景忽蒙收錄之恩山海名邦得竊須臾之樂自
非明哲少借餘光內自顧其空疎必難逃於曠敗某官
高風肅物雅望應時既愷悌以宜民亦儒雅而飾吏每
假齒牙之論曲成羽翼之私感佩良深敷述奚既

杭州到狀

得請支郡備員屬城幸茲衰病之餘託在庇庥之末即

諧瞻奉預切欣愉

賀王發運啓

伏審榮膺制檢總領漕權慘舒六路之民表裏大農之
政風聲所暨忻悚交并恭惟某官學術過人忠嘉許國
暫屈分符之寄已膺側席之思乃眷東南欲少蘇於疲
瘵無心內外當益罄於謀維凡在庇庥豈勝歡慰

賀新運使張大夫啓

一本作賀
葉運使

伏承抗旌入境揆日臨民方一節之風馳已列城之雲

靡矧惟雅故尤激懽悰伏惟某官早以異材著聞美績
議法造令久裨於廟謀宣化承流益試之民事自聞新
命實慰輿情再惟衰朽之餘得荷寬明之庇其為厚幸
未易究陳

著聞美績下四句一本作望高郎選繁
列星之經躔華使周爰凜外臺之風采

答喬舍人啓

某聞人才以智術為後而以識度為先文章以華采為
末而以體用為本國之將興也貴其本而賤其末道之
將廢也取其後而棄其先用舍之間安危攸寄故議論

慨慷則東漢多徇義之夫學術夸浮則西晉無可用之士興言及此太息隨之元祐以來真人在位並興多士以出異材眷惟淮海之英久屈江湖之上迨茲顯擢實慰輿情伏惟某官名重儒林才為國器深厚爾雅非近世之時文直諒多聞蓋古人之益友代言未幾華國著稱豈惟臺省之光抑亦邦家之慶過蒙疏示深服撝謙顧慙衰病之餘莫究欣承之意

謝右史啓

比者誤被聖恩軫及棄物起於貶所付以名藩牧養疲
民曾未施於薄效躋攀近侍已再被於寵光祿既多則
功不可微職既崇而責猶當重顧懇辭之莫獲念圖報
之未能方以為憂敢辱見慶此蓋某官德惟樂善志務
達人重緣姻好之私賁以文詞之美捧讀數四退增愧
慙屬春候之向和宜福祿之益固未遂披奉但切傾懷

賀時宰啓

伏審光膺考慎峻陟宰司孚號揚廷士識上心之所尚

置郵傳命人知聖澤之將流靡不欣愉至於鼓舞恭以
某官直方以大廣博而良進以正而正邦異乎求以求
政貫六經百子之學煥三代兩漢之詞昂稟自殊偉蕭
侯之八尺斗南莫競凜梁公之一人加以絕識見微曠
度舉遠清心省事則法可使復結繩之約強本節用則
貨可使若流泉之長材無不可範而成也譬泥之在鈞
俗無不可易而善也猶風之靡草是皆還至而有效安
見為事而無功蓋神考貽謀已完具而可按故成王績

要宜纖悉以勿加此大雅兼持而不移矧清衷圖任之
愈篤豈繫疎逃所獨詠歌惟民罔知合語則聖凡有詔
令率先惠慈回已遐邇爭傳室家胥慶顧此民逢此日
之何幸謂吾相勸吾君以愛人歡聲格於九天乖氣消
於萬彙在昔小國如彼景公損已一言退星三舍又况
以禹湯大信之誥有夔契同寅之言蠢爾憑生猶知助
順赫然在上豈不降康其愚有赤心老無佞舌輒忘犯
分顧欲輸誠然有難言是在精智蓋無交則莫與苟好

謀則必成不惡而嚴匪怒伊教終成大賴豈曰自私伏
念某遭時休明賦命衰薄蚤粗蒙於遴選比久幸於退
藏天雨何私笑流行之木偶滄溟不改嘆自蕩之波臣
重以傾歲周旋竊嘗撰屨末塗流落無復掃門豈賴補
息剿黥彫朽糞朽出薜見日去盆望天悵末力之將殫
愧明恩之莫報乃利用安身之何有儻奉法循理之可
為民社非輕猶承宣而惴惴天淵靡外亦戾躍以欣欣
某限以在外不獲躬詣省庭預百執事賀鈞屏下情無

任

下財啓

夙緣契好獲講婚姻顧門閥之雖微恃臭味之不遠敬
陳納幣之禮以行奠鴈之儀庶徵福於前人永交歡於
二姓

答求親啓

藐爾諸孤雖本軒裳之後閔然衰緒莫閒纂組之功伏
承某人儒術飭修鄉評茂著許敦兄弟之好永結琴瑟

之歡瞻望高門獲接登龍之峻恪勤中饋庶幾數馬之恭

與邁求親啓

里閭之游篤於早歲交朋之分重以世姻某長子邁天資朴魯近憑遊藝之師傳賢小娘子姆訓夙成遠有萬石之家法聊申不腆之幣願結無窮之歡


徐州謝鄰郡陳彥升啓

受代膠西甫達仁庇分符泗上復託恩私祇見吏民布

宣條教郡有溪山之樂庭無爭訟之煩曾何妄庸獲此
僥倖此蓋某官紀綱千里儀表一方議論信於中朝予
奪公於多士衰罷無術既常荷於兼容勉厲自將或無
忝於知遇感懼之素敷染難宣

湖州上監司先狀

弭棹江郊聳聞風采馳神德守若奉誨音欣抃之深敷
宣莫究



東坡全集卷七十一